

REGLUGERÐ

um þátttöku Íslenskra getrauna í sameiginlegum getraunaleik með dönskum og sænskum getraunum um leiki í heimsmeistarakeppninni í knattspyrnu 1990.

1. gr.

Íslenskum getraunum er heimilt í samstarfi við danska getraunafyrirtækið Dansk Tiptjeneste og sænska getraunafyrirtækið AB Tiptjänst að efna til sameiginlegs getraunaleiks um úrslit í leikjum í heimsmeistarakeppninni í knattspyrnu tvær leikvikur í júní 1990.

2. gr.

Um getraunaleik þennan skulu gilda sömu reglur og gilda um íþróttgetraunir samkvæmt II. kafla reglugerðar fyrir Íslenskar getraunir nr. 477 27. október 1988 sbr. reglugerð nr. 258/1989 með þessum undantekningum:

1. Á hverju spjaldi skulu vera 13 tölusettir kappleikir, sbr. 5. gr. reglugerðar 477/1988.
2. 13 reitir í einum dálki leiksspjalds mynda eina röð, sbr. 7. gr. reglugerðarinnar.
3. Verð fyrir hverja röð er 20 krónur, sbr. 15. gr. reglugerðarinnar.
4. Af verði hvernar seldrar raðar skal varið 9 krónum (45%) til vinninga sem skiptast þannig að upphæð sem svarar til SEK 0,40 skal ganga til sameiginlegs sjóðs Íslenskra getrauna, Dansk Tiptjeneste og AB Tiptjänst sem nota skal til að greiða fyrir 13 réttar ágiskanir samkvæmt getraunaseðlum seldum af þessum þremur getraunafyrirtækjum. Því sem eftir stendur þegar 0,40 SEK hafa verið greiddar til sameiginlegs sjóðs skal varið til að greiða fyrir 12 og 11 réttar ágiskanir á þann hátt að upphæðin skiptist til helminga til að greiða fyrir 12 og 11 réttar ágiskanir á þeim getraunaseðlum sem seldir eru af Íslenskum getraunum. Komi enginn seðill fram með 12 réttar ágiskanir skal allri upphæðinni varið til að greiða fyrir 11 réttar ágiskanir, sbr. 20. gr. reglugerðarinnar.
5. Falli leikur á getraunaseðli niður, eða leik er hætt áður en honum lýkur vegna utanaðkomandi atvika skal varpa hlutkesti um úrslitin. Framkvæmd hlutkestisins annast Dansk Tiptjeneste og skal um framkvæmdina farið að reglum þess getraunafyrirtækis, sbr. 19. gr. reglugerðarinnar.
6. Kærur vegna þessarar samstarfsgetraunar skulu hafa borist í síðasta lagi 17 dögum eftir að síðasta leik á viðkomandi getraunaseðli lauk, sbr. 26. gr. reglugerðarinnar.
7. Úrvinnsla getraunaseðla fer fram í hverju landi fyrir sig undir eftirliti viðkomandi ríkisskipaðs eftirlitsmanns. Að úrvinnslu lokinni skal skila greinargerð um niðurstöðu til ríkiseftirlits sænsku getraunanna sem útbýr lista yfir fjölda vinningshafa, reiknar út upphæð vinninga og skiptingu greiðslna milli landa. Reynist enginn getraunaseðill hafa 13 ágiskanir réttar leggst sú upphæð sem verja átti af sölu hvers lands til þess vinnings við upphæð þá sem greiða á fyrir 12 og 11 réttar ágiskanir. Reynist bráðabirgðaútreikningur vinninga sýna að vinningur fyrir 13 réttar ágiskanir sé hærri en 100 000 SEK skal endanleg staðfesting á upphæð vinnings bíða þar til kærufrestur er liðinn.

3. gr.

Reglugerð þessi sem sett er samkvæmt lögum um getraunir nr. 59 29. maí 1972 öðlast þegar gildi.

Dóms- og kirkjumálaráðuneytið, 16. maí 1990.

Óli Þ. Guðbjartsson.

Jón Thors.